

Mi Prome Bandera

Pa Roland W. Peterson

Roonie no por drumi. Cada rato e ta spierta y ta wak e holoshi.

Roonie tin seis aña. E dia prome el a bai cu su Tata cumpra un bandera nobo.

Nan a cumpra e bandera mas grandi cu nan tabata bende.

Cada bes cu e a spierta e ta blo pensa: ...con e ta bai hisa e bandera.

Atrobe e ta wak e holoshi y atrobe e ta pensa, ...ainda solo no kier sali.

Banda di su cama, riba un stul, e tin e bandera dobla. E bandera ta casi mes grandi cu e dekel di su cama.

Awe ta e Dia di Bandera y e kier hisa e bandera.

Ata...e ta tende un gai ta canta. E ta bula for di su cama y ta hala e cortina di e benta, pa wak pafo.

Dia a cuminsa habri,...a cuminsa bira cla.

Roonie ta coi e bandera for di e stul.

Cu e bandera den su man e ta core bai den e camber unda su mayornan ta drumi.

Roonie ta bula riba e cama y

ta cuminsa lanta su tata.

Papa, ...Papa lanta, nos mester bai hisa e bandera.

Papa ta bisa Roonie cu e ta mucho tempran, cu solo no a sali ainda.

Roonie ta bula for di e cama y ta core trek e cortina, di e bentana, habri.

Ata...Papa solo a sali.

Roonie a cuminsa ansioso awor. E a cuminsa hala su Tata na su brasa pa e por lanta.

Ban Papa, ...ban nos mester cuminsa awor.

Mama, cu tambe a spierta, ta habri un wowo so, bolter riba cama y sigui haci manera e ta drumi.

Roonie y Papa ta wak dor di e bentana, nan ta mira cu awa ta spat.

Ta kico nan mester haci si awa cuminsa yobe?

Roonie ta hopi desapunta.

Di repenti nan ta mira e rayonan di e solo ta penetra dor di e glas di e bentana.

E ta bai stop di yobe.

Cu e bandera den su man Roonie ta core sali for di cas y ta bai na e palo di bandera den

cura. Ainda awa ta stofia (finfin). Den e rayonan di e solo e gotanan ta parce djamantan chikito cu ta cai di shelo.

Nan ta dal spat kibra riba su cara chikito.

Ya Roonie ta serca e palo di bandera y ta los e conopi di e cabuya.

Pap tin di core pa gara e cabuya prome cu Roonie trek na dje, e ora ei e cabuya por Sali

For di e catrol cu ta na e punta riba e palo di bandera.

Papa ta siña Roonie con pa mara e conopi.

E bandera no mester mishi cu tera.

E prome conopi mester ta den e huki di e bandera unda e streya ta.

Roonie ta hala e conopi duro y su Tata ta controla si e ta bon mara.

Awor e otro punta di e cabuya ta wordo mara na e otro huki di e bandera.

Papa ta controla esaki tambe.

Awor Roonie ta cuminsa hisa e bandera.

Poco poco e bandera ta bai

ariba.

Biento ta supla masha duro mes. E bandera ta asina grandi cu e ta casi hisa Roonie na laira.

E cabuya ta muha y e ta slip den su manna.

Cu tur su forza Roonie ta tene e cabuya masha duro mes.

E ta asina chikito y e tin miedo cu e bandera grandi ta bai hise den laira.

E kier puntra su Tata pa yude pero e ta determina pa hisa e bandera su so.

E ta lucha cu e bandera grandi, e biento duro y e cabuya cu ta muha.

Awa a stop di stofia (finfin).

E solo ta briya y e rayonan ta cai riba e bandera.

E streya ta lombra den e rayonan.

Biento ta sigui supla duro, e dos strepinan gel ta span habri.

Ta manera un parha cu ta lanta y span su halanan pa bai bula.

Roonie ta sigui treke e cabuya y awor e bandera ta yega den top di e palo.

E biento ta supla duro,

E bandera ta bula firme. E ta

bula (wapper) den e biento y haci un zonido manera ta mil angelnan ta bati man.

Roonie ta mara e cabuya na e palo y Papa ta controla si esaki ta bon mara.

Roonie chikito no ta realisa ainda, pero dor di su lucha pa hisa e bandera, ya caba el a gana e prome bataya pa su pais.

Roonie ta core bai para dilanti di e cas pa wak e bandera mas miho.

E bandera ta bula mahestuoso den laira.

Roonie su curason chikito ta bira duro, ...e ta orguyoso. E ta bula den laira y ta dal un grito masha duro mes:

'Papa...mi a hisa mi prome bandera'

E dia bandera, henter dia, cada bes Roonie ta core sali for di cas pa wak si e bandera ta bula ainda.

E dia ei, un biaha mas, Papa ta conta Roonie e historia di nos bandera y ta garantisá Roonie, ...cu pa semper...semper...te na fin di mundo nos bandera lo bula riba Aruba.